

KZ Auschwitz

Geographesch Koordinaten:

° 50' 02" 09 N° 19' 10" 42 (http://tools.wmflabs.org/geohack/geohack.php?language=de¶ms=_50_02_09_N_19_10_42)E

D'**Konzentrationslager Auschwitz** oder **KZ Auschwitz** war e Komplex vun iwwer 40 Konzentrations- a Vernichtungslagere, déi vun Nazi-Däitschland am vun him besate Polen während dem Zweete Weltkrich an der Shoah gebaut a bedriwwen goufen.

Et bestoung aus Auschwitz I, dem sougenannte *Stammlager* zu Oświęcim; Auschwitz II–Birkenau, engem Konzentrations- a Vernichtungslager zu Brzezinka eng 1,5 Kilometer nordwestlech dovun; Auschwitz III–Monowitz, engem Aarbechtslager zu Monowice, wou d'Zwangsarbechter an der IG Farben hirer Konschtgummi-Fabrick agespaart waren; sou wéi Dosende vu weideren Niewelagere.^[1]

Nom däitschen Iwwerfall op Polen am September 1939, mat deem den Zweete Weltkrich ugefaangen huet, huet déi däitsch *Schutzstaffel* (SS) Auschwitz I, dat bis dohin eng Kasär vun der polnescher Arméi war, an e Gefaangenelager fir polnesch politesch Prisonéier ëmfunktionéiert. Déi éischt Prisonéier, däitsch Verbrieche, déi als sougenannt *Funktionshäftlinge* agesat goufen, koumen am Mee 1940 un. Déi éischt Vergasungen - vu sowjeteschen a polneschen Prisonéier, goufen am oder ëm den August 1941 am Block 11 vun Auschwitz I ausgefouert. Ee Mount drop hunn d'Bauarbechte vun Auschwitz II–Birkenau ugefaang. Dëst Lager gouf ee vun den Haaptplaze vun den Nazien hirer *Endlösung der Judenfrage*. Tëscht uganks 1942 bis Enn 1944 goufen honnertdausende vu Judde mat Véiwaggonen aus alle Géigende vum besaten Europa erbäibruucht, wouvun déi meescht an de Gaskummeren ermuert goufen; vun den 960.000 déi do ëmkomm sinn, goufen der 865.000 direkt nodeems s'ukoume vergaast. Am Ganze goufen eng 1,3 Millioun Leit an d'Lager gestach, wouvu geschat 1,1 Millioun gestuerwe sinn. Dorënner ware 74.000 net-jiddesch Polen, 21.000 Roma, 15.000 sowjetesch Krichsgefangener, a bis zu 15.000 aner Europäer. Vun deenen, déi net duerch Gas ermuert goufen, sinn déi meescht erhéngert, oder un Erschöpfung, Krankheeten, duerch eenzel Exekutiounen oder duerch Mësshandlung gestuerwen. Anerer goufen am Kader vu medezineschen Experimenten ermuert.


Op d'mannst 802 Gefangener hu probéiert, ze flüchten, dovun 144 mat Succès, an de 7. Oktober 1944 hunn zwou Unitéite vum *Sonderkommando* - Prisonéier, déi gezwongen goufen, an de Gaskummeren ze schaffen - en Opstand gemaach, deen no kuerzer Zäit awer niddergeschlo gouf. Vun all deenen, déi am Lager geschafft hunn, goufen der just 789 (net méi wéi 15 Prozent) fir hir Dote viru Gericht gestallt, eng Rëtsch dovun, dorënner och de Lagerkommandant Rudolf Höss, goufen exekutiert. Bis haut gëtt kontrovers diskutéiert, datt d'Alliéiert, nodeems se éischt Rapporten kruten, wat fir gruelesch Saachen do geschéie géifen, laang net drop reagéiert hunn, z. B. andeems se d'Lager oder d'Eisebunnslienen dohi bombardéiert hätten.



D'Paart vun Auschwitz I.



Entrée vun Auschwitz II-Birkenau.



Plang vun Auschwitz I, II an III)

Wéi déi Rout Arméi am Januar 1945 ëmmer méi no un Auschwitz erukoum, goufen déi meescht vun de Gefaangenen op engem Doudesmarsch - iwwer honnerte Kilometer zu Fouss an der Keelt - Richtung Westen an aner Lager geschéckt. Déi wéineg, déi nach am Lager waren, goufen de 27. Januar 1945 befreit. Deen Dag gëtt zanterhier als Internationalen Holocaust-Kommemoratiounsdag zelebréiert. An de Joerzéigten dono hunn Iwwerliewender, wéi de Primo Levi, de Viktor Frankl, an de Elie Wiesel iwwer dat, wat se zu Auschwitz hu missen erliewen, geschriwwen. D'Lager gouf e wichtegt Symbol vun der Shoah. 1947 huet Polen den Auschwitz-Birkenau Memorial a Musée um Site vun Auschwitz I an II etabléiert, an 1979 gouf et vun der UNESCO zu der Weltierfschaft ernannt.

Literatur

- Merten, Michael, 2020. *Die Fabrik des Todes* am Luxemburger Wort vum 24. Januar 2020, S. 4-5

Referenzen

1. "Auschwitz I, Auschwitz II-Birkenau, Auschwitz III-Monowitz." (http://70.auschwitz.org/index.php?option=com_content&view=article&id=87&Itemid=173&lang=en) Auschwitz-Birkenau Memorial and Museum op [auschwitz.org](http://70.auschwitz.org). Archivéiert (https://archive.today/20190122190412/http://70.auschwitz.org/index.php?option=com_content&view=article&id=87&Itemid=173&lang=en)

Vun „https://lb.wikipedia.org/w/index.php?title=KZ_Auschwitz&oldid=2275227“

Dës Säit gouf de(n) 24. Abrëll 2020 um 13:55 Auer fir d'lescht geännert.

Ofruffstatistik

Den Text ass disponibel ënner der Creative Commons Attribution/Share-Alike Lizenz; zousätzlech Bedingunge kënnen applicabel sinn. Kuckt Benutzungsbedingunge fir méi Detailer.